

# JESUIT CENTRE FOR THEOLOGICAL REFLECTION

*“Kukulwaizya Muzumino a Bululami”*

P.O. Box 37774

10101 Lusaka, Zambia

Tel: 260-211-290410

E-mail: [jctr@jesuits.org.zm](mailto:jctr@jesuits.org.zm)

fax: 260-211-290759

web: [www.jctr.org.zm](http://www.jctr.org.zm)

October 2007

Twamwaanzya mu luumuno a luyando lwa Jesu Kilisto munununi wesu, swebo baku JCTR!

Adventi, nciindi ca mumwaka, notusekelela kuboola kwamunununi wesu alimwi munununi wabantu boonse azintu zyoonse Leza zyakalenga kwiinda mulinguwe kutegwa toonse tube alubazu mubuumi a luyando lwa Leza.

Tulikkomene kumutumina malailile abukambausi bwa Adventi bwa mwaka uno 2007. Mukulisyomezya kuti cibeela calusangano ciisya makani abukkale (Catholic Social Teaching) ciyakugwasilizya kapati bukambausi muciiindi cilelekedwe ca Adventi. Tulizyi kuti aya malailile ayakulangwalangwa akusindinganyizigwa abeendelezi mu ma Parish eesu kutegwa akeendelane azyicitika akati kesu.

Mulumbe waatusikila wakuti myaaka minji yaiinda malailile aya alamulimo mupati kutali buyo lipailwa, pesi amutubunga twabana kilisto, tubunga twa bakubusi, amukwiisya akupaila.

Mu Adventi wa mwaka uuno wa 2007, swebo toba JCTR tulamutamba nobana kilisto mu Zambia kuti mulitelaike kujatikizya: kukkala cakupakamana alimwi akulibambila kuboola kwa Kilisto Munununi, kweempa milandu yesu akuzyala micelo mibotu, akuba basicamba nkaambo munununi wesu ulaboola alimwi alimwi akutayoowa nkaambo Leza ulandiswe.

Tulabalumba ba Fwala Bernard Mallia, S.J., bali mukulyokezya kuzwa ku cisi ca Sudan alimwi bakalyaaba kugwasilizya kuno ku JCTR, mukubamba malailile akukambauka aaya. Alimwi tulumba basankwa bayiiya bupaizi ku St. Dominic's Major Seminary bakagwasya kusandulula malailile aaya muzisyobo zyaandeene.

Tuya kukkomana kumvwa kuzwa kulindinywe mbomuliyeeza kujatikizya malailile aaya ciyakutugwasya kuti malaile acizya akalulame! Kuti na mulakuyanda kukambauka kwa Adventi kwa mwaka uuno 2007 amukatulembele kwiinda mulugwalo lweenda amaggesi a: [jctr@jesuits.org.zm](mailto:jctr@jesuits.org.zm), antela [infojctr@jesuits.org.zm](mailto:infojctr@jesuits.org.zm).

Swebo baku JCTR twaamba kuti amukabe a Adventi uulikabotu. Tumubikkide mumipayilo yesu alimwi tulomba mipayilo yanu. Muzumino wesu kausumpula bululami ca ncobeni! Twamulumba, amube a luumuno lwa Kilisto!

Ndime wanu,

Simson Mwale

Mweendelezi

JCTR Church's Social Teaching Project

**Ciiyo Citaanzi:** Izaya 2:1-5

**Ciiyo Cabili:** Baroma 13:11-14

**Mulumbe:** Mateyo 24:37-44

## **ATUPAKAMANE A KULIBAMBILA**

Adventi matalikilo a mwaka wabukombi bwesu mulusangano lwesu. Mwaka woose tulanganya kapati makani ajatikizya muzumino wesu muli Jesu Kilisto. Aboobo swebo mucisi cesu ca Zambia tulatalika kulibambila kutambula kuboola kwa Jesu alulangilo lupati nkaambo tulizyi kuti Jesu mufutuli wesu alimwi munununi wabantu boonse, azyintu zyoonse Leza zyakalenga, izyakalengwa kwiinda muliguwe kuzwa kumatalikilo kutegwa tube alubazu mubumi bwa Leza aluyando lyakwe.

Pele akaambo kabuntu bwesu kanji-kanji cila twaalila kuyandaula bubotu akusiya zinyonyo. Buntu bwesu butupa kuti tuntantamuke kuluyando lwa Leza akububotu bwakwe, alimwi akaambo kabuntu bwesu cilatwaalila kumuzyiba Leza aluyando lwakwe. Pesi Leza kunyina naleka kutuyanda tobantu anyika njakalenga. Tatuzyi kuti eeci cili masimpe omuno mu Zambia.

Adventi kasimpe nciindi notusekelela kwiinda mukupaila kuboola kwa Jesu akati kesu, amu buumi bwesu. Ino bwami bwa Kilisito mbwami bwabuti? Bwami bwa kilisito mbwami bubotu, bwabululami, luyando lwa Leza lwalo lukonzya kuzunda kudyaamininana, cinyonyo, alimwi a mazwanga akonzya kuleta mapyopyongano, kujaya buumi alimwi azyoonse zyibotu.

Ino nkaambo nzi swebo toonse tobana Zambia ncotweelede kulangila kuboola kwabwami bwa Leza? Nkaambo kakuti tuyandaula kasimpe, nzila, mumuni alimwi anguzu zyalo ziyonzya kutugwasya kuzunda makatazyo manji-manji ngotujana mubuumi bwesu, anzyintu zyimwi zyalo ziyozya kutwaandaanya abantuma, alimwi akutundululana, amicito yalunya yalo ikonzya kutunyonganya.

Izaya musinsimi utwaambila kuti, "Amuboole, atweende kumulundu wa Leza... kutegwa atuyiisye nzila zyakwe, alimwi kutegwa tweende munzila zyakwe... tweende mumumuni lyoonse. Awalo Paulo Musaante ulatwaambila kuti : Nobakwesu, amusiye zyintu zyoonse zyalo eezyo ziomuyandisisya kucita mumudima; pele amusole lyoonse kweenda mu mumuni wa Jesu kilisto". Bukwabilizi bwaamba Paulo caamba kuti twelede kukakatila zintu ziyumpula buumi bwamuntu oonse kutegwa umwi aumwi apone buumi bulaabulemu. Nkakaambo kako Izaya musinsimi ncali alulangilo lupati kuti Bantu bayakusandula zylwanyo zyabo kuti zyibe zylimyo, a masumo aabo kuti abe masakela. Eeci cilacitika ciindi notutalika kulwana akuzunda bulyato bwesu, nkabela akubeleka kuti tumane lwaandaano, mazwanga akutaabana kuliko mu mikwasyi yesu, mutubunga twesu, akati kabantu boonse, mu ziyombelo, mu mikowa, mu makani abuleli bwa cisi, a mulizyamakwebo amu cisi cesu ca Zambia. Ncilwanyo cili buti ncotweelede kujana kuti tuzunde nkondo eeyi? Paulo ulatwaambila kuti Jesu Kilisto abe necilwanyo canu. Cilwanyo ca Kilisto ni nguzu zya muya wa Leza, muya upa buumi wa luyando a busongo, walo ngwakaboola kutupa mbuli muntu a muntu a mbuli mbungano ikutegwa atwiisye nzila zyakwe kuti tweende munzila zyakwe.

Nkakaambo kaako Leza ulazumanana kukanana kuli umwi aumwi wesu mukati kamyoyo yesu, kwiinda muzyintu zytucitikila mubuumi bwesu alimwi kwiinda muzyintu zyibotu nzyaalenga. Leza ulakanana kuli ndiswe kapati kwiinda mu mwanaakwe Jesu Kilisto walo wakaba muntu mbuli ndiswe kutegwa atupe buumi bupya. Muya uusalala ulatupa nguzu kutegwa tucikonzye kuzunda cibi akukakatila bubotu lyoonse. Eeci cikonzya buyo kucitika kuti na twaleka kuba Bantu baliyanda akusola kuba Bantu balyaabide lyoonse kubelekela bamwi mbuli Jesu mbwaakacita. Aboobo tatweelede kutyompwa, pele tulelede kuzumanana caluyando kuleta kulekelelana, bunyina, alumuno akati kabantu boonse kwiinda muli Jesu Kilisto.

Izaya musinsimi waambila Bantu bakwe kuti baleelede kulibambila kuboola kwa munununi. Inzya ciindi ca adventi nciindi notulibambila kuti tukaakusekelele kuzyalwa kwa mufutuli wesu Jesu-Leza wakaba muntu mbuli ndiswe. Jesu wakaboola kutegwa ibwami bwa Leza busike akati kesu, alimwi

**JESUIT CENTRE FOR THEOLOGICAL REFLECTION**

*"Promoting Faith and Justice"*

**P.O. Box 37774 10101 Lusaka, Zambia**

**E-mail: [jctr@jesuits.org.zm](mailto:jctr@jesuits.org.zm) Website: [www.jctr.org.zm](http://www.jctr.org.zm)**

kwiinda mulinguwe amu kukambauka kwakwe alete mulumbe mubotu walufutuko mu majwi amu micito yakwe. Akaambo kaako wakakakwa akujayigwa, abaabo bakasala cinyonyoono alufu, kufwida ndiswe kuti tujane lufutuko. Pesi Jesu wakazunda satani alufu, ubi a buzike, kwiinda mukubuka kubafu kutegwa aswebo tukacite mbubonya. Nkakaambo kaako swebo tobakilisto mu Zambia ncotukonzya kulwana kuti ibubi bwakuulana makulo bumane, aboobo kube mpindu mu bubelesi akuti bucece cibe cintu cakainda.

Mumulumbe wasunu, Jesu utwaambila kuti ciindi ciyakusika zyintu zyoonse noziyakumana. Ulatwaambila kuti katukkala katulibambilide ciindi coonse. Umwi aumwi uleelede kulilingula, akuleka tumpenda toonse tuleta kutavwana, kudyaamininana, kuteendelena akati kabantu, azyeezyo zyoonse zytulesya kuyanda bubotu bwa beezuma kwiinda mukubelekela luumuno a bululami, kuponya a kuleta antoomwe Bantu, akuyandaula bubotu bwa Bantu boonse. Kuli mpindu mpati ijanwa mukutobela kulaya kwa Bantu. Pele tulazumanana kuyandaula biyo zyeezyo zyibotezya myoyo yesu tobeni kakunyina kulanganya bamwi. Tulabadyaaminina akubatundulula kwiinda mu kubabbida cibeledede, ibuntu bwabo.

Ciindi eeci notulangila kuboola kwa munununi wesu Jesu, atulilingule, atulange mbuli mbotupona mumikwasyi yesu, mutubunga twesu, mumasena motubelekela amumasena moonse motujanika! Nobakwesu tulelede kuyuma kupaila kutegwa Jesu atuponye, atusungulule kuzwa kutumpenda toonse kutegwa Jesu akuboola akajane tulamulindila amyoyo isalala alimwi ikondedwe. Aboobo tuyakucikonzya kuyanzana abenzuma akwaamba mbuli mbotwamvwa mu Ntembauzyo ikuti luumuno lube andinywe, notuyakucikonzya kusyomezyanya ca kasimpe kuli umwi aumwi kuti “Ndiyandawida nduwe bubotu!”

### **MIBUZYO YAKWABANA AKUKOMBA MUTUBUNGA TWA BANA KILISTO**

- Ino bwami bwa Leza mbwami buli buti, alimwi nkaambo nzi ncotulindila alulangilo lupati mukuboola kwa bwami bwa Leza mu Zambia?
- Ino ncikwabilizyo nzi ncotuyandika kutengwa tuzwidilile mukulwana mapenzi ajanika akati kesu?
- Ino Jesu inga watugwasya buti kuti tuzunde tulengwa atupenda tuli mulindiswe twalo ooto tupa kuti tutabeleki canguzu mukuleta luumuno mu twaambo twa cisi, amu makwebo acisi ca Zambia?

### **CISOBANO**

Akuba muntu omwe kakatazya akutundulula beenzyinyina (Atwaambe bone). Mpoona umwi muntu wamvwa kulila kwa Bantu aaba batundululwa, asike akubagwasya. Mpoonya aaba Bantu basekelele lwaangulukolwabo mukukondwa antoomwe abantu boonse mumunzi.

### **ZYLUMBO ZYA BASIKUZUMINA**

- Mwami tulalomba kuti utupe muya wako waluyando abusongo kutegwa tucikonzye kupona a kweenda mu luumuno lwako. Kotuswiilila O Mwami.
- Leza Taata, tulalomba kuti ujule meso eesu kutegwa tulibambile kabotu kuboola kwa bwami bwa Jesu mu kilisimasi. Kotuswiilila O Mwami.
- Mwami kotugwasya kuti tulipe cakumaninina mukubelekela cisi cesu ca Zambia kutegwa Bantu boonse bapone mu luumuno lwa Jesu Kilisto. Kotuswiilila O Mwami.

**JESUIT CENTRE FOR THEOLOGICAL REFLECTION**

*"Promoting Faith and Justice"*

P.O. Box 37774 10101 Lusaka, Zambia

E-mail: [jctr@jesuits.org.zm](mailto:jctr@jesuits.org.zm) Website: [www.jctr.org.zm](http://www.jctr.org.zm)

**Ciiyo Cintanzyi:** Isaya 11:1-10

**Ciiyo Cabili:** Baloma 15:4-9

**Mulumbe:** Mateyo 3:1-12

## **KAMWEEMPWA AKU ZYALA MICELO MIBOTU KUTEGWA TUTAMBULA CHRISTU MUFWUTULI WENSU**

Mupailo wamatalikilo wasunu watutamba kuti tugwisye zintu ziyitukasya kutambula Christu caku komana mu myoyo yesu. Ncecitu Johani Mupapatisi catwitila kuti tucite. Atulibuzye mibuzyo yobelo eyi: Mubuzyo wakutaguna, hena Christu ulonda nzi? Mubuzyo wabili wamba kuti, ino zyintu zyi mubumi bwesu amu cooko cesu nzyotwelede kugwisya kutegwa tumutambule Christu? Kuingula kumuzyo ooyu koonku: Christu ulasika nkaambo kakuti mubusongo bwakwe uyanda kuyumya busongo bwesu kutegwa tucikonzye kumvwa akucita bululami lyaonse. Christu usikila kutuyumya kutegwa tumubelekele aku penga anguwe. Ino twakumanizya lweendo lwesu ansi aano uyotubunganya boonse mubulemu bwakwe mubwami bwakujulu.

Eecino nceciindi swebo tobana Zambia ncyotwelede kuti tuzyange mbuto zya bululami a lumuno mu mikwasyi yesu, mutubunga twesu amucisi cesu kutegwa tucikonzye kuzyala micelo minji mibotu yeledede mubwami bwa Leza. Ino nkambo nzi Jesu cayanda kuti swebo tuzyale micelo mibotu? Nkaambo kakuti ngonguwe utapa buumi alimwi nkootupa micelo mibotu kutegwa bumi bwesu abwany mboyizula buzuzikizigwe. Eeci nceciindi nokubula nzala a nyota, alimwi ceciindi umwi a umwi ncatamwi kukatala pesi ulizwide azintu zyibotu akukoondwa mbuli baama Maria, banyina Jesu Christu mbobakakondwa mucimbo cabo cakulumba mucindi eeciya mucelo wa mwana Leza nowakasyangwa mulimbabo (Luka 1:46-55). Zisyango zya bululami a lumuno, ziyakulekelelana aku mwana, zyaluse a luyando zyasanga mubulongo bubotu bwabumi bwesu mbotu tilila ankasalo zya kupenga kwesu a luyando Leza ndwasanga mubulongo bubotu bwa bumi bwesu. Zisyango zyabo zitondezyo zya kulangila kutegwa zintu zyonse ziyakuzuzikizigwa muli Christu a micito yesu yoonse iyotebulwa.

Ino twasika kumubuzyo wesu wa bili: ino zyintu nzi mubumi bwesu nzyotwelede kugwisya kutina tulayanda kumutambula Christu akatikesu? Kuti natulayanda kuti tucikonzye kucita buyanda Christu, tulelede kugwisya zintu zyoonse ziyibambwa amuzezo wa muntu alike zitendelani amuzezo wa Christu. Tulelede kuleka kusebenzya magwi mbuli “yebo andime kwina kukanana kusikila lufwu.” Mubufwafwi, swebo tulakakilwa kupona bumi bwakasimpe nkambo kakuti mubusongo bwesu tulajinka. Nokuba boobo, tulelede kujana muya wa Christu kuti utugwasya. Tulelede kuziyiba zyintu nzyotwelede kucita kapati tulelede kuziyiba zintu eziya zitutola ansi mubuntu bwesu.

Nokuba boobo tuyoijana nzila yakuti tuciiince tumpenda tubi tupakuti tucise beensuma. Tulelede kuti tumpenda ootu tube kabotu akaambo kabeenzuma. Ino eeci inga cacitika buti? Isaya ulijisi bwinguzyi kumubuzyo ooyu mumabala aya napandulula Mesiya Kuti: “Mulinguwe muya wa Leza mouli, muya wabusongo, muya wanguzyu, muya waluziyibo alimwi muya wakuyowa Leza.” Jesu Christu ngwe majwi a Leza alimwi mabusongo bwa Leza. Jesu Christu uli ngwe majwi a Leza alimwi ngwe Busongo bwa Leza wakaba muntu akupona akati kesu. Wakaba muntu mbulindiswe kutegwa tucikonzye kwabana busongo bwakwe bwalo bututondezya nziyila akutupa nguzu mubumi bwesu.

Ino swebo tulaziba buti kasipe ka mizezo yesu kujatikizya twaambo twabukale bwesu mumikwasyi amu tubunga twesu twabana Christu. Tuyo cikonzya kuziba kuti tubunga ootu twembelwa a muya wa Leza. Ino swebo tuzyiba buti kuti twembelwa a muya wa Leza? Tulazyiba kuti twembelwa a muya wa Leza ciindi eciya notu yeya aku cita mbuli Jesu Christu. Tulelede kubikala maano kubenzuma bapengede kapati batajisyi cakulya kakuli tulijisyi zintu zyibotu mucisi cesu ca Zambia. Alimwi tulelede kubalanga kabotu baana basyoto bataunki kucikolo akaambo kakubula mali a milimo yakubeleka.

Ino atulange cakasimpe kuzintu zyicitika mucisiy cesa ca Zambia. Muya mubi ulatwembela mucindi notwiima benzuma zyintu zyobabula. Tulelede kuzyiba mbokutambulwa beenzu besu kutegwa andiswe tucikonzya kutambula Christu akati kesu. Aboobo tulelede kuzyiba mbokuponwa kabotu mulumuno abeenzuma boonse. Isaya wakatutondezya mbotwelede kupona kabotu abeenzuma. Boonse twaitwa kuti katulanga twaambo cabusongo mbuli Leza mbwatutondezya nguzu zyakwe.

Paulo musante ulatuisya kuti tatwelede kusowa lulangilo notusola kubamba maumi eesu kabotu. Tulelede kuziba kuti eeci inga cacitika akati kesu. Eeci inga cacitika akambo kakuti Leza uli andiswe lyoonse uli libambilide kutugwasya. Leza ulatugwa kapati munzila zyotatwe eezyi? Cakusanguna, tutobezeze mukazyano ngwakatutondezya waku lekelelana. Cabili alimwi ncecibotu cakuti tulelede kupona mubunyina boonse. Catatu nca kuti tulelede kuli cesya kwinda mukubelekela beensuma mbuli Christu. Christu wakatutondezya eeci kwinda mukusanzya mauulu abasikwiya bakwe. Jesu Christu uyanda kuti andiswe tucite mbubonya oobo.

Mumulumbe wasunu, Mateyo watwaambila kuti mumupapatisimo tulapapatiswa mumenda yatusazya zyibi zyeesu. Mupapatisimo ulatugwasya kuyanda Leza abeenzuma. Mupapatisimo kwinda mukubelesya menda utatugwasya kutambula mupapatisimo wa mulilo a Muya Usalala. Nakali aciingano Jesu wakatambula Mupapatisimo wa mulilo a Muya Usalala. Ooyu ngomupapatisimo mupati, alimwi ulatupa nguzu kwinda mu nguzu zya Christu. Ulatugwasya kwenda munzila ya Christu kutegwa zintu zyoonse zyakuzuzikizigwa tuyopona munguzu zya Jesu mubwami bwa lumuno a luyando, bululami a kucenjela. Amen.

#### **MIBUZYO YAKWABANA AKUKOMBA MUTUBUNGA TWA BANA KILISTO**

- Ino cintu nzi cikozya kutugwasilizya mutubunga twesu kuti tuzyibe cakasipe kujatikizya twaambo twabukale bwesu?
- Ino cintu nzi citugwasilizya kuti swebo tutasowi kulangila mutubunga twesu?
- Ino swebo zitugwasya buti nguzyu zyamupapatisimo mubumi bwesu aanomazuba?

#### **CISOBANO**

Umwi wanu abe cigebenga alimwi kanywa maningi bukoko. Bumwi buzuba ooyu muntu waswaingwa a muna Christu. Ooyu muntu ponya wacinca waunka kukabunga watalika kubeleka milimo yabunkutwe.

#### **MUPAILO WAMUKABUNGA**

- Atulombe, Omwami tulomba Muya wako utugwasye kuzyiba cakasipe kutegwa tusale kucita zintu zibotu mutubunga twesu. Kotuswilila Omwami! Twakukomba kotuswilila!
- Atulombe, Omwami twakulomba kuti utupe nguzu kutegwa tube bana Christu bayumunta mumuzumino. Kotuswilila Omwami! Twakukomba kotuswilila!
- Atulombe, Omwami twakulomba kuti utegwasye lyoonse notusola kucita zintu zytwakazumina ciindi camupapatisimo. Kotuswilila Omwami! Twakukomba kotuswilila!

**JESUIT CENTRE FOR THEOLOGICAL REFLECTION**

*"Promoting Faith and Justice"*

P.O. Box 37774 10101 Lusaka, Zambia

E-mail: [jctr@jesuits.org.zm](mailto:jctr@jesuits.org.zm) Website: [www.jctr.org.zm](http://www.jctr.org.zm)

**Ciiyo Citaanzi:** Izaya 35: 1-6.10**Ciiyo Caabili:** Baloma 5: 7-10**Mulume:** Mateyo 11:2-11**AMUKKAZYIKE MYOYO, MUFUTULI ULABOOLA**

Muciindi cino ca Adventi, lusangano lulatulomba kuti katupaila kutegwa tukasekelele kuboola kwa Munununi wesu a luyando a kulumba nkaambo Kilisimasi waswena mumsi. Tobana Zambia inga twalibuzya mubuzyo utobela ukonzya kutugwasya kusekelela uti: ncinzi Kilisto ncayandila kutufutula na utufutulila nzi? Kuyingula kuniini nkwakuti, Jesu wakasika kuzotufutula kuti tuzwe mubuzike kutegwa katupona mbuli Bantu balaa lwaanguluko, bayakana akupona buumi mukukondwa. Hena eeci tacili cintu ncotulangila toonse kucitika ku bana besu abaabo mbotupona limwi? Mosesi nakabamba cipangano a Leza kumpela a Bantu bakwe wakababuzya kuti basale na bayanda buumi na lufu(Deutronomia 30:19? Kusala cipangano caabambwa a Leza caali kwaambilizya kubika lusyomo lwabo muli Leza uli ngo magolelo abuumi bwabo. Kukaka cipangano ca Leza, akulisyoma beni kutali kusyoma muli Leza, caambilizya kutaba alusyomo mubuumi. Kupona buumi munzila yamusyobo ooyu ciletela muntu mapenzi akubona kuti buumi mbwabuyo alimwi tabweelede kuba.

Ino swebo tulasa nzi? Ndiyeeya kuti inga twavwiila mbuli bana Israyeli no bakoopolola mujwi lyomwe kuti tuyanda kusyoma muli Leza wa cipangano. Pele, hena, kuvwiila kuli boobu kuzwa mumyoyo yesu na mu mizeezo yesu na majwi buyo? Na kuti tuyanda kwaamba ncotuyiminina, atulibuzye mibuzyo yobilo eeyi: cakusaanguna, hena tulizyi na twacibona kale mu maumi eesu, mu mikwasyi yesu, mutubunga twabana kilisto a mucisi cesu ca Zambia? Alimwi caabili: hena tulizyi na twacibona kale mu maumi eesu, kuti kusyoma, alusyomo, alimwi luyando akulumba zylaba akaambo kakuzumina akutobela Jesu Kilisto, walo uli ngo cipangano cipya, utukulwayizya lyoonse, akutupa nguzu zyakumana zyimpayuma zya mu buumi bwesu kutegwa kaumweka.

Aboobo kuvwila mubuzyo wakusaanguna- hena tuyanda kufutulilwa nzi a Jesu Kilisto? Atulange mbuli mbotupona muno mu Zambia twamana tulatalika kulivwila amubuzyo umbi uti- hena ncinzi Jesu ncalilibambilide kufutula ndiswe? Mukwaambilizya makani akuboola kwa mufutuli, Musinsimi Izaya wakasinsima eezyo Jesu mwini zyakali kutondezya basikwiiya ba Johane Mupapatisi naakabatuma kuli nguwe kuya kumubuzya kuti: hena nduwe wakeelede kuboola na tweelede kulindila umbi? Izaya ulatukulwaizya akutwaambila kuti myoyo yesu itatyompwi pele tuyumywe maanza eesu, tutagonkelwi mu magondo alimwi tulangile buumi bupya. Kudadalika kuli mbubo-mbubo kwiinda kuwida lyo ansi! Kutyompwi a mapenzi zyinoliko, pele kwiinda mu luse lwa Leza tuyakuzunda. Pele Leza uyanda kuti cakusaanguna tulange kutakkomana kwesu mpotubede, omuya munyika yazinyonyono motukonzya kulitola akusunka beenzuma muzyintu zytatugwasyi kwiinda mu mizeezo a micito yesu alimwi a mbotwaalilwa kubeleka milimo mibotu. Tweelde kuzyiba zyintu a zyilegwa zytatugwasyi mu buumi bwesu nkaambo zyinyonganya myoyo yesu a bulongwe mu mikwasyi yesu, kapati a beenzuma a boonse mbotukkala limwi, mutubunga twa bakilisto, muzyikolo zyesu, mu masena motubelekela, mukucita makwebo eesu, mu makani akulela cisi cesu a mu twaambo tujatikizya zyisi zyakuunze.

Ncencico eeco ncotulila antoomwe a mulembi wa Ntembauzyo kuti: "hena lusyomo lwangu luzwa kuli?" (Intembauzyo 120:1). Inga twatalika kuyandaula nzila zyakutuzwisya mudindi ndyotwakali kulisyida tobeni antoomwe a beenzuma. Inga twatalika kuyandaula nzila zyakusoleka kululamika bulongwe bwesu a beenzuma. Pele inga twalyaambila kuti twasola nzila zyinja anji pele kunyina cicitika. Kuvwiilwa nkotujana mumyoyo yesu ityokede nkwakuti: "Lugwasyo lwangu luzwa ku Mwami Leza wakalenga kujulu ansi!" Ncencico eeco Musinsimi Izaya ncatwaambila kuti, munununi uzwa kuli Leza, Kilisto nguboola kuzyootupa ciindi cakucinca akuleka kucita zyibi antoomwe a beenzuma. Leza a Jesu Kilisto balatugwasya kubona zytondezyo zynji alimwi tabakozyi kutulekelezya kapati boonse babika lusyomo muli Leza baya kufwutuka mbuli Kilisto mbwakasyomezya baabo basyomeka. Aboobo tulijisi nguzu wakulidunda akutalika kweenda katulangide mujulu alimwi akukulwaizyana akugwasya bamwi besu, kapati aabo bali mumsi-mumsi lyesu, mu mikwasyi yesu, abaabo mbotukala amwi mutubunga twa bakilisto.

Atulange eezyi zytondezyo tubone ncozyikozya kutucitila. Leza ulajalula matwi eesu lyoonse notutateleeli bamwi Bantu, kapati nzyobabulide, alimwi kuli zyeeyo zyobasoleka kutwaambila. Leza ulatugwasya kubaswiilila akubavwa. Leza ulajalula meso eesu notuli boofu ku masimpe ajatikizya buponi, bubi bwesu a bwa Bantu boonse. Leza ulatugwazyilizya kweenda mu kuliiba mu luumuno a mulwaanguluko kutegwa swebo a cisi cesu ca Zambia citanikusunkuti mu kweenda kuti bucete cibe cintu cakainda alimwi tubone kuti kuli kwaabana kuli kabotu a lusingpuko. Leza ubula milomo yakumukananina notuumuna buyo a kucita kube kunyina bubi butola busena alimwi notwaalilwa kwaamba masimpe notubona zyintu zyinyongene akati kesu. Mbombuboo

**JESUIT CENTRE FOR THEOLOGICAL REFLECTION***"Promoting Faith and Justice"***P.O. Box 37774 10101 Lusaka, Zambia****E-mail: [jctr@jesuits.org.zm](mailto:jctr@jesuits.org.zm) Website: [www.jctr.org.zm](http://www.jctr.org.zm)**

mbwatusumpula akutugwasya kusumpuka mbuli mbotweelede kugwasya aabo batalanganizigwi, kapati bamakaintu a boonse basalaulwa mu mikwasyi, mu masena motubelekela mbuli mucibeela ca lwiyo, cibeela cilanganya misamu ya muziyibadela akubona kuti Bantu bala ancito. Leza ulatucinca kapati mbotulanganya Bantu mbotutazyi mbuli basikutija nkondo abaabo mbotutayandi kukkala amwi a baxiswa bulwazi bwa sikalileke, aboobo tweeleda kutalika kubakwaabilila akubagwasya. Camamanino pesi kutali cisyoono, Leza ulatwiisya akutugwasya kuti katubabamba ba mucaala abamakaintu bakasweekelwa bamaalumi baabo, alimwi abaabo baxiswa bulwazi bwa sikalileke, pele cipati nkucinca buumi mbotupona mu mikwasyi yesu a mu cisi cesu.

Eezi zytondezyo zya milimo mipati ayi niini yalo Jesu njakabeleka alimwi akupa nguzu aabo babikkide lusyomo mulinguwe. Kuti na twatalika kwiibeleda milimo eeyi njakatusiila Jesu, inga twatalika kuzuzyikizya zytondezyo zya bwami bwa Leza. Eeci cilengwa inga catalika kuyaka miyanda akuzyala micelo muli ndiswe a mu cisi ca Zambia. Ino tuyakusala nzi twakubona kuti zytondezyo eezi zyipa buumi, zyalo zili zyozyitondezyo zya luse lwa Jesu Kilisto kazyibeleka alimwi kazyiliko akati kesu? Hena tuyakumutambula Jesu akuba basikwiya bakwe akwiindilizya kubeleka mukukondwa anguwe muzytondezyo zyakwe? Jesu lwakwe mwini wakatwaambila kuti kakutakwe nguwe kunyina ncutukonzya kucita pele kuti tuli antoomwe anguwe, inga twacinca malundu mapati akubula bululami aku dyaamininwa. Aya nga malundu ngotubbazyika bamwi besu, alo anyonganya buumi bwesu a buumi bwa munyika yesu alimwi a zyoonse zyamunyika ziyibotu zytujisi.

Mubuzyo ngooyu: Hena tutola ntaamu nzi mukubelekela kuti lwaanguluko lwesu lube notucita mulimo wa bululami a luumuno mu bwami bwa Leza? Ndiza tulayoowa notucita mulimo ooyu mupati, ukatazya. Cibalo cesu cizwa mulugwalo lwa Jemusi Musaante cilatutondezya mbotweelede kubeleka kutegwa tutani kuyoowi na kubeleka cakufwaambana kwamana twacileka. Cakusaanguna ncakuti tweeleda kwiiya kutabindaana, kuba basicamba akutalekela akati twaswaanya mapenzi mapati na maniini. Zyiimwi zyiindi kumuka kwakucitika kwazyintu kulatyompya nkaambo kakuti zyintu zyicitika mbotutayeeyeli na tatwiiboni cakufwambana micelo ya bukutausi bwesu. Mukwiya kuba basicamba, tulayiya kulinda cakupakamana kubona kuti lusumpuko a zyoonse zytwakali kubelekela zya cinca mu mikwasyi yesu a mu cisi cesu ca Zambia. Swebo tobana Zambia, hena tuyakulindila ciindi cilamfu buti kubona kuti mulawo mupya mubotu wa cisi cesu wabambwa!

Mulweendo lwesu oolu tweeleda kubona kuti twabamba akumana twaambo tutunyonganya, alimwi a twaambo tujatikizya tubunga twa bakilisto twalo tukonzya kutukasya kuya kumbele. Hena tulatubamba buti twaambo otu tukatazya akuba Bantu balekelelana. Cakusaanguna, tweeleda kupana bulemu akulemeka beenzuma kutali kuleta lwandaano. Munzila eeyi inga twabelekela antoomwe mu kasimpe a muluyando kutegwa tuzunde zyoonse zytwandaanya mukusoleka kubona kuti tupaona kabotu. Nzila yomwe ikonzya kutugwasya nkulinda canguzu akupakamana akujata camba kubona kuti nzila eeyi ikatazya yakutuletela luumuno a bululami. Aboobo inga twaba anguzu zyakutalekezya mulimo wesu na kuti twabika lusyomo lwesu muli Jesu walo ujisi nguzu zyzunda mudima alimwi ngutumunikila munzila eeyi akutulemununa mukuli wesu. Inzya, oobu mbotuyakucikonzya kuba basicamba akumana mapenzi a kulila, kubula bululami aku dyaamininwa. Mukucita boobu tuyakucikonzya kusekelela kuboola kwa munununi wesu Jesu Kilisto mu luyando a kulumba a kukomana.

#### **MIBUZYO YA KULILINGULA A KWAABANA MUTUBUNGA TWA BAKILISTO**

- Ino ncinzi ncutukonzya kwaamba ciliko akati kesu citondezya kuti Kilisto ulatufula alimwi utufutulila nzi?
- Mozesi wakababuzya Bantu kuti basale akati ka buumi a lufu. Zytondezyo nzi zyliliko mu mikwasyi yesu, mutubunga twa bakilisto, mu cisi cesu, zyalo zytondezya kuti ncobeni twaasala buumi?
- Hena bwami bwa Leza bujisi makani ali oonse ajatikizya Bantu batulela mu cisi cesu ca Zambia sunu? Makani nzi alimwi ncinzi ncaatucitila mumaumi eesu toonse?

#### **CISOBANO**

Muntu omwe abe sikulombelela, kanyamwide katuundu ulema mponya muntu uyinda bo anzila, amusanzye a kumusanina. Sikulombelela ulaunga kakonededwe akusekelela.

#### **ZYLUMBO ZYA MBUNGANI**

- Atulombe, O Mwami, kotwiisya kuzyiba kuti wakalonda kuzotunununa ku mapenzi kutegwa tukayisye bamwi besu kuzyiba lufutuko lwa masimpe. O Mwami kotuswilila! Twakomba, kotuswilila O Mwami!
- Atulombe, O Mwami, kotusolweda mutubunga twa bakilisto kutegwa katusala nzila itupa buumi. O Mwami kotuswilila! Twakomba kotuswilila O Mwami!
- Atulombe, O Mwami, tulomba kuti utugwasye kuba zytondezyo zya luyando, luumuno, bululami a kukomana. O Mwami kotuswililila! Twakomba kotuswililila O Mwami!

**JESUIT CENTRE FOR THEOLOGICAL REFLECTION**

*"Promoting Faith and Justice"*

P.O. Box 37774 10101 Lusaka, Zambia

E-mail: [jctr@jesuits.org.zm](mailto:jctr@jesuits.org.zm) Website: [www.jctr.org.zm](http://www.jctr.org.zm)

**Ciiyo Citaanzi:** Izaya 7:10-14

**Ciiyo Cabili:** Baroma 1:1-7

**Mulumbe:** Mateyo 1: 18-25

## **MUTAYOOWI MWAMI ULAANDISWE**

Mwika zyisyoonto zyayinda kumatalikilo akulangila kuboola kwa mwami, ijwi lya Leza lyakatalika kutubuzya a kutwiita kuti tuziyibe kuti tuleelede kwaangululwa kuzwa kuzintu ziyfundilizya buumi bwesu mu cisi ca Zambia mumazuba eesu. Aboobo inga twalibambila ca kasimpe kumutambula Jesu uboola kuzyootunununa kuti tupone mukuliiba. Nsondo ino yamamanino ilatugwasya ikubona kuti ino ncinzi ncotweelede kucita ciindi notwabuka. Tuleelede kulilanga tobeni mukati kamyoyo yesu akulanga ziyicitika akati kesu kutegwa mukusoleka kulibambila kwesu tukonzye kweempwa kasimpe kulubazu ndotutola mukunyonganya bulongwe bwesu tobeni a bulongwe bwesu a beenzuma. Nkabela eeci cilatukasya kubona Leza uli mulindiswe amubeenzuma. Kuti twatalika kweempwa, tulabona mbwayandika Jesu mubuumi bwesu kuti aponye buumi bwesu a mbungano zyesu ziyiliciside. Eelyo inga twatalika kubona kuti inzya twatalika kumutambula munununi wesu walo uboola kutegwa tutalike kupona kabotu alimwi akukkomana kuti ino ino zyintu ziyileenda munzila iluzi. Nokuba boobo, inga twajana kuti nokuba kuti twasoleka kululamika zyintu mubuumi bwesu, kwaciindi cisyoono buyo inga twalijana kuti twatalika kuwa akusunkwa kuti tuleke kubambulula maumi eesu.

Mbombubo oobu mbototalika kusowa lusyomo kuti kucinca kububotu kulakonzeka. Inga twatalika akusunkwa kwaamba kuti amulange muziyikombelo zyesu a mfulumende yesu, abasololi bapati boonse, ino batugwasya kasimpe swebo a cisi cesu kuti tube Bantu basibululami abasiluumuno aalo Bantu boonse mpabalemekwa akusumpulwa mu maumi aabo? Akati kesu tulazumanana ikubona makulo atamani, kulwanina busololi, kutundululwa kwa bamakaintu a bana, alimwi azyimwi. Tulatalika kutiyompwa, aboobo kuli ndiswe bukombi ciba cintu cituumbulizya kusyoono pele citakonzyi kuleta kucinca mumaumi eesu a manyongwe. Mpampawo awa ijwi lya Leza tulituyasa mubuntu a bukkale bwesu kuti na tula amuzumino kasimpe na tunyina, antela akuti ino muzumino uli buti ngotujisi. Muciindi muzumino wesu nousunkwa inga twapa kwiingula kobile kujwi lya Leza, nzila yakuba amuzumino antela kusowa muzumino, nzila ya lusyomo antela kubula lusyomo. Ino tuyanda kucita mbuli Mwami Ahaz muciiyo citaanzi kuzwa ku musinsimi Izaya, antela tuyanda ikubweza ciimo ca Joseph ncotwatondezyegwa mu mulumbe wa Mateyo?

Atulange cakusanguna mbuli Mwami Ahaz mbwakaluba ibuumi bwa Bantu bakwe bamajuda a mbuli mwami Leza mbwakali kusyomeka akubagwasya muziyiindi zyoonse nobakali mumapenzi. Leza kunyina nakabalekelezya pele wakali kulubazu lwabo lyoonse. Eeli lyakali nde jwi lya muzumino muJuda uli oonse ndyaakayeledede kwaamba buzuba abuzuba. Pele Ahaz taakasyoma mulugwasyo lwa Leza, wakasyoma munguzu zyakwe mwini amunguzu zyabeenzinyina balo batakali kusyomeka alimwi bakamucita kuti abe mubelesi na muzike wabo akumicita kuti akake Leza caantagalala. Nakabona kuti zyintu zyamubijila abeenzinyina boonse bamulekelezya cuusisya, wakasowa lusyomo a lulangilo loonse akukaka kupiluka ku Mwami Leza wakaangide cizuminano abantu bakwe. Pele Izaya musinsimi naakakatala kumukulwayizya Mwami Ahaz abantu nobakacimwa, Izaya wakapa Ahaz citondezyo citondezyo kuti kufumbwa citakonzyeki kubantu Mwami Leza walo ulacita. Wakamupa citondezyo ca mukaintu wakaba a mwana, walo wakali ngo Leza uli andiswe Emmanuel. Ooku kwakali kumutondezya Ahaz kuti na wasyoma muli Leza, Leza inga wabazwisya Bantu bakwe mumapenzi oonse. Pele Ahaz wakakaka kuzumina citindezyo eeci aboobo Ahaz abantu bakwe boonse wakalijana mubuzike mu Babylon.

Pele mu mulumbe twajana muntu ulaalusyomo, wiimpene a Mwami Ahaz wakanyina lusyomo. Ooyu muntu wakali Joseph, mulombwana silusyomo, wabukkale bubotu abantu walo wakalijana mumakatazyo mapati ciindi naakayanda kubweza Maria muumbulu kuti abe mukaintu wakwe kumunzi wakwe. Mbututi mbwaakali kunga Maria wawisya kusyomeka kwa Joseph kwiinda mukumita kabatana kwatana. Joseph cakamumanina maano akumukatazya kumvwa kuti ncizi cakali kucitika. Pele takayanda kumusampula Maria antagalala kweendelana a mulawo, pele wakasala kuyobola bulemu bwaMaria akumuzwisya amunzi cakaumuumu. Joseph wakacili kumuyanda

**JESUIT CENTRE FOR THEOLOGICAL REFLECTION**

*"Promoting Faith and Justice"*

**P.O. Box 37774 10101 Lusaka, Zambia**

**E-mail: [jctr@jesuits.org.zm](mailto:jctr@jesuits.org.zm) Website: [www.jctr.org.zm](http://www.jctr.org.zm)**

akumusyoma kapati Maria. Pesi wakabona kuti oobu mbobubotu muntu mbwanga wacita aboobo wakalivwa kuti wakeelede kumucitila Maria bubotu kwiinda mbwaakacitide. Nkakaambo kaako wakacaala kanyongene mumoyo mukuti taakali kukozya kusowa lusyomo muli Maria cakumaninina. Nkabela Leza nakabona kuti lusyomo lwa Joseph lwakali lunji wakamusalazyila zyoonse zyakacitikide kwiinda muciloto. Kasimpe Leza ulilibambide kutugwasya ciindi coonse kujana nzila zyibotu zyakumana mapenzi akuleta bululami ciindi notubona kuti kunyina ncutunga twacita swebo lwesu. Mubutonga tuti "Mukowa ncifuwa"-eeci caamba kuti mukowa taumani. Leza unooliko lyoonse mubuumi bwesu muzyindi zyaandeene kutugwasya.

Muzumino wa Ahaz wakawa ciindi naakapegwa citondezyo caamba mbuli Leza mbwanga watufutula kumakatazyo oonse. Pele muzumino wa Joseph wakacaala muyumu nokuba kuti takali kucikonzya kuzyiba kuti nkaambo nzi cakaba bobuya a Maria. Leza mbwaakamutondezyela buyo Joseph ncaakali kucitila bobuya, Joseph taakamuka wakabweza mukaintu wakwe Maria kung'anda. Wakasyoma kuti catakali kukonzyeka atuswe mumaano eesu cakali kukonzyeka kuli Leza. Aboobo Leza wakazuzikizya kwiinda muli Maria cisyomezyo ncaakapede mu musinsimi Izaya kuti Kilisto uya kuba muntu. Nkabela kilisito kali akati kesu alimwi antomwe andiswe, uyakucita kuti mazyalano abantu boonse akazumanane kulwanina lumuno abukkale bubotu mu maumi oonse.

Izaya wakasinsima zya mbuli bwami bwa Leza mbobunooliko lyoonse, akuti bwami bwa nyika na bwa muntu bulooleka kwainda buyo ciindi. Jesu wakabanyandya bapati-pati ba bana Israyeli balo bakali kulangila Mwami wa nyika waalikunga ulayindilizya buleli bwabo bulaamusemo anguzu zya muntu buyo kuleka Leza. Mbubwena mbuli Mwami Ahaz abalo baakaka kumuzyiba akumutambula Emmanuel, Leza uli andiswe muli Jesu. Bakabona akuvwa mbwakali kukanana anguzu akucita zyintu anguzu zya Leza muli nguwe, akuyaka mumuzumino, lulangilo a luyando bwami bwa nguzu zya Leza aluumuno, bululami aluyando. Ngooyu mutwe wasunu: "Mutayoowi! Leza uli andiswe!" mucisi cesu ca Zambia sunu, kuti na twabika biyo lusyomo muzyipego zyesu a maano eesu akulanganya zyintu zyoonse mukuyandaula kwesu azyitukondelezya, kunyina cibotu ncututicite na kunyina nkocititotozye eeci. Munzila ilibuti njobanga balaanguzu abanyina nguzu, na bavubi abacete akati kesu, bali atala abadyaamininwa, batalikakwabana kabotu zyintu zyibotu Leza zyaakalengela Bantu boonse? Munzila ilibuti motunga twacita zya makani acisi cesu akuba azyiyanza zya makwebo zisumpula muntu oonse akuleta bululami mubantu boonse? Bwiinguzi bulaantagalala mbubonya mbucakabede kuli Joseph: kuti tuzumine akuzyiba kuti Leza uli andiswe, Jesu kasimpe wakazyalwa kwiinda muli Maria muumbulu mubelesi wa Mwami Leza. Catakali kukonzyeka cakakonzyeka kuli Leza. Aaya nga masimpe amwalo mucisi cesu ca Zambia sunu! Nkaambo Jesu mufutuli wesu wasika alimwi ulatwaambila kuti "Ndime, Mutayoowi!"

### **MIBUZYO YAKWABANA AKUKOMBA MUTUBUNGA TWA BANA KILISITO**

- Ncinzi citupa kusowa lusyomo ciindi notuli mumapenzi mu mikwasyi yesu, mutubunga twesu, a mu cisi cesu ca Zambia?
- Mukulwana makatazyo mapati mwami Ahaz wakanyina lusyomo muli Leza, pele Joseph walo kali a lusyomo muli Leza. Ino ulaalusyomo muli Leza ciindi nojana makatazyo mapati alimwi mbubuti mbotondezya lusyomo oolu?
- Nciiyo nzi cipati ncowayiya muciiindi ca kulangila Mwami mu mwaka uno wa 2007 alimwi mbubuti mbociya kukugwasya mu mwaka wa 2008?

**CISOBANO:** Akube Bantu bobile, umwi abweze cibeela ca Joseph umwi ca Maria. Joseph wazyiba kuti Maria ulimitide, aboobo wasunkwa kuti amuleke. Mpoona mungelo wamuswaya. Wasyoma kuti Leza wakali kuzuzyikizya kwiinda muli Maria cisyomezyo ncakabambide kwiinda mu musinsimi Izaya. Wakkomana cakumaninina.

### **ZYLUMBO ZYA MBUNGANO**

- Twakulomba O Mwami kuti lyoonse tube a lusyomo muli-ndiwe, akutasowa lusyomo ciindi notuli mumakatazyo mumaanda eesu, mutubunga twesu, a mucisi cesu ca Zambia. Kotuswilila O Mwami.
- Twalomba kuti utupe nguzu zyakugwasya baabo batundululwa munzila zyaandeene kuti basumpulwe. Kotuswilila O Mwami.
- Twalomba O Mwami kuti utugwasye kukutambula cakulyaaba amukukondwa mumyoyo yesu a mu maanda eesu mukusekelela kuzyalwa kwako. Kotuswilila O Mwami.

**JESUIT CENTRE FOR THEOLOGICAL REFLECTION**

*"Promoting Faith and Justice"*

P.O. Box 37774 10101 Lusaka, Zambia

E-mail: [jctr@jesuits.org.zm](mailto:jctr@jesuits.org.zm) Website: [www.jctr.org.zm](http://www.jctr.org.zm)